

**Kalaallit Nunaanni illunut inissianullu Radonip qinngorneranut illersuutilersuinissamut periarfissanik misissuititsinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinerup imarissavaa pisortat ingerlataanni illuni aamma nammineq illuni inissianilu pisortanit pigineqartuni arlalinni periarfissarsiornissaq. Kingusinnerpaamik 2023-mi ukiaanerani ataatsimiinnermi misissuinnermit innersuussutit saqqummiunneqassapput.**

(Inatsisartunut ilaasortaq, Mariane Paviasen, Inuit Ataqatigiit)

### **Akissuteqaat**

(Ineqarnermut Attaveqaasersuutinullu Naalakkersuisoq)

### **Aappassaanneerpeqarnera**

Naalakkersuisut sinnerlugit Sanaartornermut Ataatsimiititaliaq isumaliutissiisummik sukumiisumik suliaqarneranut qutsavigaara.

Ataatsimiititaliap suliarinninnermini oqaatigaa illuliortiternernut aningaasalersuineq pillugu inatsisip iluarsaanneqarnissaanut piffissamut tunngatillugu Naalakkersuisut siullermeerinninnissamut allannguutissatut siunnersuutaanni naapertuutinngitsoqartoq.

Taamaalilluni danskisoortaani allassimavoq iluarsaassineq 2023-mi ukiaanerani ataatsimiinnissamut saqqummiunneqassasoq, kalaallisoortaani allassimalluni 2023-mi upernaakkut ataatsimiinnissamut iluarsaassinissaq saqqummiunneqassasoq.

Taamaattumik ataatsimiititaliaq allannguutissatut siunnersuummik inassuteqarpoq, illuliortiternernut aningaasalersuineq pillugu inatsisip iluarsaanneqarneranik, nammineq inigisani radoneqassutsimik annikillisaanissamut atatillugu aningaasartuutissanut taarsigassarsititsinissamut periarfissanik pitsanngorsaasussamik, kingusinnerpaamik 2023-mi upernaakkut ataatsimiinnerup nalaani, saqqummiussinissamut Naalakkersuisut peqquneqarlutik.

Ataatsimiititaliap allannguutissatut siunnersuutaa Naalakkersuisut kissaatigisaannut naapertuulluinnarpoq.

Taamaattumik Naalakkersuisut upernaakkut ataatsimiinnerup matuma nalaani *Illuliortiternernut aningaasalersuineq pillugu Inatsisartut inatsisaata allanngortinneqarnera pillugu Inatsisartut inatsisaannut (Radoneqassutsimik annikillisaanissamut taarsigassarsitsineq tapiissuteqarnerlu)* siunnersuut saqqummiuppaat. Tamanna Naalakkersuisut allannguutissatut siunnersuutaannik piviusunngortitsisussatut isigineqarpoq. Naalakkersuisut siunnersuuteqarnerminni kissaatigaat soraarnerussutisiallit aammalu innuttaasut nammineq inigisaminniittut, aningaasassanik atugassinneqarsimasut aammalu

radoneqassutimik annikillisaaffigineqarnissamik pisariaqartitsisut, inigisaminnik  
radoneqassutimut annikillisaanissamut taarsigassarsinissamut imaluunniit  
tapiiffigineqarnissamut periarfissaqalissasut.

Taamatut oqaaseqarlutik Naalakkersuisut ataatsimiititaliap allannguutissatut siunnersuutaat  
akuerineqassasoq inassutigaa.